

928
7
11

後村先生大全集

二





後村先生大全集卷第四十四

詩

憶古

晚遇先皇詔起家負金蓮
炬紫薇花犯顏屢抗塗歸
疏斷腕難操起復麻
忍不入時逃北谷老難待漏守
東華人生唯有村田樂
未覺封侯勝種瓜

雜興十首

昇天雖可喜削地已堪哀
早知守厠去何須拔宅來

二

早持堅白論晚踏軟紅塵
明逸并夷甫初終似二人

三
地逼難容足天低礙舉頭那堪去梯子誰遣上高樓

四
不肯彈冠起餓從折簡招雖然舐丹藥未免悔青苗

五
做子高官職雙眉皺不開譬如三日婦錦靴着珠鞋

六
開閣何其盛天章行邊寢已踈遠床彈指嘆六丈聖人歎

七
典領天書使修崇昭應祠可憐有遺恨殮不得髭緇

八
專報熙豐怨寧論爵齒可憐五朝老雙淚落齋旒

九
擾擾多群蟻冥冥有幾鴻蜀公陵下語竟免入碑中

十
策免身常佚登庸貌轉癯富公忘杖起迂叟要人扶

次徐戶部韻

不能測海更觀天頗廢開荒與糞田碧眼暗中疑有
崇白蕉肘後惜無傳佛云泡影應如是儒說心思既
竭焉老子冥搜難屬和公詩美似彈丸圓

記漢事二首

一 溺天子殿衙歐丞相車茵古有禮揖客今無劾弄臣

二

秦尊君卑臣漢敬賢如賓解衣南鄭將前席洛陽人

又六言二首

羣雄走野逐鹿一士入海騎鯨不聽安期畫策便知

子羽無成

二

貴藥大佩六印賦侏儒俸一囊曼倩面 饑色蟠桃

三度偷嘗

雜記六言五首

移了太行王屋飛上釣天帝居點子盡淪鬼錄敢免
方讀仙書

二

五更三點待漏一日十行讀書圖南先生仙者偶然
睡覺月餘

三

十月在胞胎裏一朝出顛門外不干靈丹九轉且看
純陽二字

四

上界尤多官府丹成不必飛冲四仙一歲一度來聽蓬萊松風

五

曾何薰兮杲調亦聞鏗爾琴聲愛清廟音倡歎嫌玉臺體浮輕

寓言

夢裏依佈若在傍安知覺後忽他鄉裁成出戍衣封去挑就迴紋錦寄將多謝舊官留破鏡半為蕩子守空房偶逢女伴悲酸嘆不是披緇意味長

再次竹溪韻三首

誰云子建卷波瀾詩到黃初最可觀無奈中衰變風起不應例作晚唐看煎膠粘莫教春去秉燭遊誰管夜瀾縱有閒愁天樣大此翁爛醉不相干

二

健筆當年彙可排豈知老挾病俱來芽梨煨熟曾分啖楮拙燒殘共畫灰仗壁尚堪傳學者伏生壁藏尚書虞廷猶記和康哉向時同輩諸君子輸與村翁早乞休

三

小詞落拓通希真未典春衣未是貧窮肯磷緇久幽操老猶熏沐不費身營巢燕熟飛來舊脫袴禽癡喚

看新蜀口塵清江浪白息頭重作太平人

自和效顰一首

未愛京師傳子貞園池冷落戶庭貧神仙疑是丹丘
子年記高於絳縣人春去似催花送老歲荒聊喜麥
嘗新晚知嵇阮非酣暢名與孟中物孰親

挽陳常二首

幼共從師長五年暮齡彼此各華顛我辭台斗先還
笏君望蓬萊忽引船差勝於朝於市者相携某水基
邱邊老儒未至忘情地便是瞿聃亦玄然

二

族甲莆鄞鮮擬倫兒班玉筍塔朱輪折財遍及揀華
子艇粟均沾菜色民鄉飲酒希先酌者洛英會失戴
花人與君世世聯墻住晚築新阡亦卜隣

送延平鄧醫

和扁過門千百輩鄧先神妙七閩推
漢書鄧先猶言鄧先生也非
閔玉枕方猶閔白是金篦刮已遲天下宜無書未見
世間唯有老難醫綺裘寶馬相酬未抵樗翁七字詩

再贈一首

藥囊價重百車渠肯受村翁折簡呼失喜迎君瞻紫
氣必能為我索玄珠晨興舐鼎嘗殘藥夕暝吹燈據

搗括乞取刀圭補精髓天公豈忍瞎癯儒

次韵建安章南舉拔贈

薄有田園興閑挑艸木情慙勤美年少存問老書生
晚覺論心少誰堪歃血盟吾衰得吟友不憚攬衣迎

送山甫赴嶺口倉與黃兄來復同載

德遠先生學者師此即超詣可傳衣凌雲才子聲名
早煮海麤官氣力微二尺檠高今與古三家村有是
和非真湏滿了葵邱戍策杖溪邊待壁歸

送山甫赴嶺口倉五言二首

離步唯相捨今為薄宦驅長年幹父蠱晚節賴家驅

鄉近多安訊時清少急符故人問即罷卧起一節扶

二

三子俱飽繫將如此老何吾方期跨竈汝勿厭熬
波食壁心尤苦鹽梅味主和先民羞詭遇不在獲禽多

記辛酉端午舊事二首

老子從來寵利輕於棊待詔昧平生內中稱賞秦郎
帖御筆批衣不必更

二

最怕搗詞與草床明朝傳布競攻瑕而今失韵棄平
仄撻布煌堂一任他

雜興四首

何待頡美方引退暫忘設醴可覘終申公見事差傷
晚直待髡八十翁

二

滿城士女鬪鮮粧無藥能整一國狂猶有當年舊旗
鼓溪頭讓與少年郎

三

落月導螢穿絳幔殘膏呼鼠覆青燈心知點鬼傭窺
屋戶上聊施艾道陵

四

九節菖蒲採極難慙勤來自武夷山去年苞寄分同
好今日栽成忍獨冷胡翁去歲所寄種之圃
業生可愛時翁已仙去

山甫既別三日復得此詩追餞

珍重吾兒記誓言獻之玉帳及輜軒漢鉏者眾商多

犯漢鹽鐵論云敢私賣
監者鈇左趾鈇足鈇秦稅民深吏少思監竹忍饒

母食筍割葵輕手勿傷根烏衣子弟多佳音莫遣諸

賢笑後村

曉意

鴉啼曙色尚朦朧驚起山房夢蝶翁始悟區區大槐
裏不如栩栩亂蒼中

無題

鯨海外多仙境
界蟻窠中有小乾坤
不愁北谷愚公老
自覺南柯太守尊

轅固

非竇太皇崇老子
呵公孫子說周公
漢廷可是無驍勇
刺豨須煩九十翁

醉鄉六言二首

戒飭長鬚赤脚客
來酒掃送迎莫言老子晏起
但道先生宿醒

二

古帝神遊其所飲
仙死葬是中晉人
竊往者眾唐初始絕不通

久雨六言四首

夏雨轟轟斷霧新
蟬已噪庭槐不曉阿香何意故將車子頻推

二

汗體方遙團扇粟
膚俄索袂衣束緼盡驅蚊去捲簾莫礙燕歸

三

初疑猿子隄決又恐蝸皇石穿已
是吹翻茅屋那堪

流了葑田

四

平陸莽為巨浸晴空變作漏天明朝是小暑節重露
必大有年

小暑日寄山甫二首

微官便有簡書畏貧舍非無水菽歡插架籤存世先
舊堆床笏美一時觀遠書且問平安好前哲曾嗟嗣
守難了却臺參早懷掇暫歸亦可小團樂

二

七年侍膝極融怡半月分襟費夢思北鹿門翁吾齒

老作魚梁吏汝官卑擊鮮何忍為兒溷反鮓無煩寄
土宜若見省郎問村叟不能書札尚能詩

用舊韻贈瑩上人

飛錫應來從鷲嶺卓茅渾未有蜂窠輸他靈運先成
佛笑殺僧伽改姓何一半芋甘慳共飽六如語妙不
須多珍公禱喝方行用肯看詩仙掛搭麼

挽禮待中舍朔齋劉公三首

元祐相君纔六世端平朝士不多人冰翁仙去傳佳
壻鐵漢亡來有後身誰向淹中起棉蕝何曾閣下掌
絲論未知造物何年代昂復儲精嶽降神

二
紛紛健吏奉新書一點仇星絕世無
鉗治人心不忍秉牢盆筆涕先濡
近臣遠作輜軒使法從臞於陋
巷儒懊惱西風情太薄不吹老淚
到蕪湖

三

玄都觀裏曾聯句鏡壁堂中許附名
客舍炊梁成蠅夢僧廬煨芋忽雞鳴
君賢惜不登台輔吾耄何堪拜
老更直待無身始無痕有身死到
恨難平

開五月八日宸翰口號十首

有文殊佛來禪室無後將軍顏草廬
肉眼錯有病居士玉音猶記老尚書

二

叩墀還笏今三閏誓墓垂車又五春
賴有兩輪大圓鏡當空照見戴盆人

三

飲歌未必懼顏氏裹飯誰曾訪子來
天上人間唯玉帝肯分兩露到枯芝

四

樹精猶識呂翁仙輿尉安知絳老賢
黃吻小兒吾語

汝古來天子禮高年

五

喜教肅才令次對揚明逸手與同登臣於二老非侍
匹慚愧虛加學士稱

六

三重茅喜無乾雨一辨香祈大有年却笑癡人即山
鑄不如老子仰天田

七

物色桐江垂釣客招延商嶺茹芝翁水歌帝閣董絃
裏密啟垣夾袋中

八

曾為元禮登龍客亦上昭王市駿臺相與席間珠履
說翁雖謦有詩來

九

翁叅老龍華皓首兒非逸驥附青雲辦香先祝堯天
子次祝汾陽郭令君

十

古人一飯必思大如天未易忘因罷白頭相告語三
生不可負容堂

雜興四首

尚記青燈同講貫安知白首始遭逢向來眾論稱雛鳳歲晚同時拜老龍時伯紀為范制

二

梁松帝堦拜堂下伏波將軍坐受之汝雖自詫樊川姪吾未嘗聞蔡克兒

三

醉尉怒呵故侯獵亭長豪奪徵君牛射虎將軍餘怒在賣藥先生一笑休

四

箒中尸忽為秦相跨下人俄拜楚王老退已成大父

笑行嘲一任少年即

贈許登仕登瀛

蓬戶無人來問疾薇坦道汝妙通仙此翁書眼真盲

矣之子心眸愈瞭然觀西潤君詩預算粉郎將死日管轄為何

慢能推絳老始生年清漳守相方懸榻應助君平賣

卜錢

送方汝楫客授嚴陵用

昔年尚友先君子晚見賢郎自策名芹泮佩衿尊鄭老桐江諳牒派玄英譽髦孰不觀朝彩耄齒吾難主夏盟若見監州煩問訊必分風月照寒檠

晚意

夢入華胥國土來
哈嚙不省夜何其
青燈明滅窺昏眩
絳幘殷勤警惰嬉
窓外百禽更唱和
禪中羣風尚貪癡
病翁未得全無事
不作新詩改舊詩

方具免犢走筆次竹溪中書韻

不知捷徑在終南
應是癯儒骨相凡
馬負遙瞻隔河洛
牛車蚤已出般函
自憐鬢雪今垂嶺
豈料條冰晚入銜
望見蓬萊吾足矣
逆風不慮更吹帆

懷舊

陌上傳宣學士聲
旋旋席帽拂華纓
催騰制草依時

進多點宮蓮徹夜
明五相一翁真薄命
三君八俊總虛名
世間妙物無過酒
澆得胃中磊隗平

二

昔掌綸言提史筆
心思日力兩徒勞
藏山書可禿千兔
釣海力能連六鼇
空有風號陵上柏
更無春到觀中桃
蒼梧雲暗重華遠
淚落當年舊錦袍

四舍二首

源裏人家太古時
爭為雞黍歎漁師
下山莫向城中說
第一休教太守知

二

桀溺長沮振古豪不能歷聘遂深逃
禮浪說求田意最高

寓言

生有縫春諷死無封禪書不須求大手吾自表幽壚

硯

圓眼珠單顆方穿玉一窪寶如双白壁草了十黃麻

老志十首

富貴浮榮何足道綱常大義詎容差皆云養子將防
老豈若嬌嬰未識爺上欲奪情俾歸家臣寧斷腕不
操麻向非十日留黃力輦路幾於誤築沙山相

二

擁萬貌貅佩玉麟內防天塹外邊塵昔嘗以處范韓
老今奈何灼許史親孤士但知怒螳臂先皇不罪批
龍鱗此身只合山陰佳長作陵邊洒掃人厲得留鑰

三

甫入烏臺賓客賀杜舉朝側耳聽枰彈臣方抗奏嬰
龍領上已批依免豸冠皦日方中寧有蔽佞山一拔
了無難追攀老艾吾安敢聊喜詞臣不辱官艾軒嘗繼副端除日

四

端平忝綴鴻行未曾抗綱常疏一通諸老不能回橫

議孤臣猶記寤清衷鶴林莫掣傲象時烏府甘彎射
羿弓謂吳季永
將伯見西澗相君知我者篋中尚書記遺忠

五

憶昔叨陪冊府仙曾陳大計環珮前探符癡妾空
勞矣當璧休祥已灼然奉蜚相真曾浴日倚楹女豈
敢貪天分明狐趙俱釀賞不似之推隱去賢記陳宗
上書語

六

京華泪沒易忘歸欲去還如鳥着鞴但見朝臣均佚
詔未聞御製送行詩執艾昔幕前驅伯棄如今扇失
寵姬白首漁翁空感慨當時餞客半臯夔壬戌補外

七

善提坊裏早多病翰墨場中竟未勳徑以文辭擢臣向
俄而科第與劉蕢上方好問疑經義子不能通史闕
文拈起祈招猶未識安知五典與三墳丙午
賜第

八

堯言播告幾絲綸服漢衣冠易介鱗羞戰黑山為虜
將俾王青社備藩臣招懷河北來降者嚮附山東聽
詔人可惜蹉跎隳晚節聖恩尚許廟為神山東
詔令

九

衛王自謂過伊周奕葉珥貂何足酬四世五公禁太

盛六卿三家僭有由地寒曾為國遠慮天高未察臣
志謀京檜令終貞幸矣何須接踵貴嬉攸端平乙未輪對

十

此篇不是臣當筆清曉貂璫忽踵門朕欲散文安用
偶卿多古意勿傷繁院收同列殘篇去家有先朝聖
筆存臣億何嘗無氣性芻言安得及王言辛酉科詔

漫興

身似着冠狂賀監面如留髮老盧能無丹竈地燒鉛
永有海潮音話葛藤龍象聾觀俱讚嘆犬鷄癡望共
飛昇門前驀有侵辰客向道先生寢未興

二

送老虛寂寞濱聖朝乃復記遺民
摘溫洛熒河
筆藻飾寒灰槁木身雖拜老龍呼學士肯教夜鶴怨
山人它時題內征西墓道是先皇獻納臣

寄盧威仲中書

艾翁孝廟老詞臣曾許樛翁接後塵想見柳邊飛蓋
客不忘蒼外小車人無斜封出公嚴憚有賜金揮僕
未貧聞上三房婦大手周洪以後欠新綸

懷王制恭應鳳

因交明允知坡穎余與其尊公喜少公文更雅醇才

德林先生全集
見石堂
幸儒林得吾子奈何宰相失斯人未揮潞國告廷制
久作河陽入幕賓自古墳荒且送奏開元張珀與均
寄馮初心給事

三入承明倦論思都門祖帳憶當時琴彈古調將歸
操篋寶初心送別詩經歲空函無一字侵朝明鏡有
千絲遙知手內封還筆山尚堪移此不移

寄吳恕齋侍郎

幾年病卧禪床上一旦名標御札中收召東都無處
士記憐北谷有愚公依然晚景垂衰白勝似天街踏
軟紅多謝臯夔與周召十分結裏後村翁

寄劉實齋侍郎

狂胡昔犯高安郡井邑皆經蹠血餘兒童猶記馴治
化盜賊能全白鶴居子政子駿皆博學公是公非各
着書侍郎鼎貴殿諸老劉氏愈著而大歟

寄翁丹山侍郎

閱盡諸公上要津丹山除日一番新六卿尤重大宗
伯九制須還老舍人太史將封乃留滯紀瞻雖召尚
逡巡應憐公幹今衰病頻寂書來寂寞濱

寄洪雲巖尚書

再尹神臯逾兩載市無羣鬥獄無寃至尊猶遣使傳

詔細故何煩士舉幡昨日十牙兵遠帳今朝幾箇客
過門懸知一念尤忠愛報大臣知聖主思

悼吳校勘

必大

去國親朋風雨散惟君從步至徐州時清相有容
雲意力薄吾無荐禰思遠遜猶疑在空谷大招安肯
入脩門忽聞社友傳新訃枯日滂然有泪痕

後村先生大全集卷第四十四

後村先生大全集卷第四十五

詩

感遇二首

趣朝參多失曉不堪舞蹈始休官臨危昔以頭全
懲念今無髮指冠醉語唐嗔狂李白病忘漢免老
暮年感泣龍銷扇直到來生淚未乾

得舊藏大士小像

最可哀絕交免穎與松煤揖賓兒引陪禪
孫扶下阼階鏡裏雙瞳無復即頂門一隻有
此偈誰言說親見龕中大士來

秋暑

七月熱如焚復似烹煉成女媧石列甚祖龍坑

窟難梯上天河莫挽傾黃昏一陣兩高枕聽韶聲
子 林倅餉予雙雞

空谷楚然聞足音敷勤通守致家禽陰晴不爽司晨
暮全無起舞心夢短那堪眠警枕脰長稍已怯
衾可憐一念尤迂濶即誦西山夜氣箴

蚊二首

中傷過吻士窺伺捷偷兒
露筋女千載有荒祠

處半身亦

落忝承家

富烹魚後顏臞飲啄饒

肝雖眇小蛛腹欲婪酣若輩盈穹壤哀哉餒不堪

二

昔曾蹴龍象而况爾區區敢以一隻口當吾七尺軀

生形猥瑣撲殺血摸餽欲換秋衣著渠猶戀布襦

送方文甫判官追錄舊作

撇筆騷情俱妙絕它人才少子才多分桐江派從初

粗在孔門中占二科此潘輿添燕喜向來韓木尚娑
娑傳聞仲舉高懸榻應待元寮入禮羅

衛生一首

沙虱鬼車徵物爾偶然逢彼立災身朶頤昏吻中傷

汝射影瘡疔點汚人抑子原云中人影動成瘡疔刑讀生書衛思解

毒特降魔咒竟無神寄聲禽大休輕出出東坡艾子莫向

荒山點水濱

墻西一首

只留一影伴山房坐待墻西隙月光鶴忽歸來尋舊
里燕猶相對語斜陽雖無傳附青雲顯類有書消白

日長萬一載，騁人間，宇為言儂，僅識偏旁。

飲中題一首

曾從莊列問端倪，俗學區區等甕雞。佛法須償蚯蚓債，帝魂化作杜鵑啼。安知丞相嗔如屋，但見山公醉似泥。它日門人求注脚，只須標作飲中題。

小桃源

出山已不辨東西，新徑多岐失故蹊。源裏飄紅無雜樹，村中載白有遺黎。略如菴識認來路，似有茅茨遙隔溪。太守漁郎兩癡絕，自迷豈解指人迷。

六言偈四首

佛祖流傳信具兒，孫承襲付度一箇。深夜携歸一箇，中路奪去。

二

浪云如霧如電，又如天海一漉。金棺現兩脚，板鐵葉護死髑髏。

三

天帝釋宰元化，阿修羅坐道場。邀鳳翔迎骨禮，受金輕補鉢庄。

四

佛者別南北，宗儒家分朱陸。氏鵝湖許多公案，燒了。

沒一些事

竹溪生日

兩翁雖老殊精悍筆力縱橫可掣鯨晚各為農同保
社昔借謁帝入承明不嫌華髮稱遺老猶冀餘年看
太平從古文文章家鮮繼芳寮自可主齊明

二

試把過江人物數溪翁之外更誰哉不爭百草羣芳長

寧殿千花萬卉開

半山菊詩千花萬卉凋
零後始見閨人把一枝

周廟瑟曾

三嘆詠舜廊琴亦載虞來老人高唱兒童和眼見蟠

桃熟幾迴

送子敬赴潮倅七言二首

四十年前示此除偶因詩禍免題輿故交反眼炎涼
異歲月驚心露電如御內條冰疑有欠鏡中鬚雪摘
無餘南州刺有隨陽雁若北江湖易害書

二

歷監三郡無殊渥飽閱千帆奈逆風晉尚高設重方
外漢稱半刺曰治中不惟守聽廉丞語所至民歌別
駕功他日潮人感遺愛祠槎溪老人祠公

又絕句二首

東閣郎君已貳卿幹回嚴冷作和平專人昔暴於家

韞太傳今賢似父兄

二

物貴皆由褚幣輕
近聞五嶺亦通行
舊時白草黃茅裏
有大鷄聲布有聲

挽去華主薄姪二首

汝是家珍寶
虹光貫夜惚
友生塾中慕
才子樹旗降

顏氏應難兩唐人誅獨中孤叔云
如還此子有兩顏氏
黃香未易雙
向來

有椽筆老去付誰扛

二

子美尤稱位
昌黎若惜滂
色空融佛性
冰炭置吾腸

未審生何國
猶疑在我傍
一條勝謝傳
老不廢蒼棗

羅浮寄公儲子洪二兄四首舊作追錄于此

片帆約我上羅浮
已戒籃輿與共遊
到得羅浮君不見
後期又是八千秋

二

城中冠蓋匆匆散
老子空携影逐身
追路餞余三百里
斯人心事異他人

三

別來怪雨揀顛風
想見江頭惱此翁
湖海毛龍身九尺
可憐蟠屈葉舟中

四
若見子期煩問訊二詩真可續坡仙捷材渠侶雜弦
箭澁思儂如上水舡

容堂生日

玉守清無一點塵冷冷笙鶴下青旻大期爵德尊三
者上界神仙第一人經畫中原皆向化燮調四序鎮
如春自憐九袞鬚眉老龍鶴難陪祝壽賓

送太淵宰安溪七言三首

御堦人看放班回誰記乾淳舊事哉進卷已嘗觀所
主聞絃上欲老其才割鷄必待着民我謠豈多由縣

譜來道莫勝流俱不屑艾軒做了到誠齋

二

昏昏默默嗟衰朽白白紅紅憶盛強自古人惟稱單
父至今我尚愛桐鄉刈時留取葵根在拔處無令薤
本傷邑有澹臺輩流否不妨迎致向琴堂

三

吾觀明府毫端妙傳傳尊公肘後方番俗尚歌漢東
抑莆人不剪召南崇威驅未若心懷惠內荏徒然外
抑強想見江鄉與閩嶠家家各炷一爐香

又五言二首

子去臨民社公私必小寬皆云官似水誰道縣如灘
村絕追胥跡溪無督賦痕自從陳李後古調少人彈

二

剖決時通夕將迎或望塵官為賢令尹位下郡專人
尚欲平州欠何曾歎縣貧能容老夫否負耒去為民
東惠安同安葉陳二明府併煩安溪林明府

寄似

吾友二三子聯翩有國都平平雖縣譜急上奈州符
亦既吹齋矣還能吸醋無高年頗更事莫哂瞽言迂
和黃彥華帥機六言十首

世情喚做三絕佛眼譬之六如當日最宜為語而今
老不中書

二

子美花狂已減玉川茶興方濃耕處偶逢沮溺池邊
懶送夔龍

三

老矣宦情素薄天於書分尤慳寧作一鷗海浮長笑
六鼇負山

四

吾嘗評齊物論未知彭殤孰賢蒙莊略曉些子分別

小年大年

五

世無識面仙者或言飛過洞庭望斗氣半空紫衝秋
霄一點青

六

遺棠六丁取盡君王謾遺所忠既友商山四皓又容
淮南八公

七

似憐翁老吾老寧論子才不才皆云法當止矣况於
身要扶哉

八

老閱萬般交態病無一點世情但憶懶殘芋熟都忘
太乙藜青

九

骯髒倚門如教滑稽玩世非顛坡即崇寧奎宿白是
開元謫仙

十

已邀入真率會更約過天津橋從此年年歲歲莫負
月夕花朝

余戊辰日生彥華贈余十首詩皆吸風

飲露天仙語也余雖如數效顰往往雜
以世俗人語昔人云江東無我卿當獨
步必發彥華一笑

六言二首

賦金屋信美矣記玉樓果何如人間國艷難得上天
才子不多

二

蒯酈提趨沸湯信越狗烹弓藏向來猛士盡矣與誰
共守四方

贈天隱李君瑞一首

唱名納祿尤崖異誓墓休官更崛奇先輩翔而皆集
矣廣文得此欲逃之聖門豈不高曾哲列傳何為首
伯夷虎帥聽君誰敢犯莫欺此老白鬚眉

次韻鄉侯計院二首

諸老皆曾接典型鷺湖一輩亦豪英晚持師說尤堅
壘不怕兵家會斫營晴色極佳宜歲事郊行因好訪
情民朝家要採風謠否第一君侯號治平

二

還山非敢厭承明鶴淚鶯啼若个清警言句摘稀慚傑
思博封冰少見交情當年扈跸重金貴他日飛空一

劍輕莫問路頭何處去出門萬里水雲程

詠史五言二首漢初

西都生昂宿東升聚奎星僅可尊秦陛安能肅漢廷
收圖懲滅籍起蕝欠私經何況杯美語書之浣汗青

二唐李

雖化家為國其如夏變夷可汗偕天子蕭后作闍氏
玉檢無升頂珠襦有裸尸未應長樂老飲酒又吟詩

道釋六言二首

蕭衍老公苦行捨身之舉壯哉祇怕侯丞相者不許梁
朝覲面

二

大榼酒時酌酹小瓢藥自貴珍老去修持如故向來
符呪通神

記漢事六言二首

絳然擊柱諸將付之起蕝叔孫向來常罵儒腐今日
方知帝尊

二

始欲報五世相末不投萬戶留少從黃石公授晚與
赤松子游

兩朝口號六言二首

堯舜若稽古外烈祖聖謨洋洋道理一句最大卓冠
萬世帝王

二

宇宙色吾仁內充之惟天惟堯昊穹敬此一字千載
以待永昭

記漢唐事六言二首

黃鵠之歌萬古大風之作激昂橫汾酒酣樂作其如
感慨悲傷

二

輦路感春草句殿閣賦董風人聯句未聞筆諫凭高

空憶侍臣

送君用姪判官

天官長榜該久差公相繁機押勅遲佩玉徐行真上
介着鞭先發任羣兒方慚常宁詢黃髮絕喜吾宗見
白眉聞說守侯留福墨水衡召拜必同昔

題近豪

簞瓢久已甘顏巷筆橐先曾侍漢廷杜視王侯等蜚
蟻坡輕名利比蝸蠅更無荐鮪儀登俎昔有求羊炬
入陵老矣終身作僮父諸公努力佐中興

絕句三首

定本蘭亭傳屢久党公薑字發蒙初兒童若問何人
寫向道樗翁八十餘

二

愁腸一飲輒無美病眼四眚常有花
舊日讀書垂釣處重尋如到別人家

三

潘郎鬢豈春能綠東野有非雪亦寒
世外那無仙可學人間惟有老難瞞

戊辰重陽絕句

馮唐白首尚含香衛武諄諄肯惜荒
萬一享年如二

老猶堪爛醉十重陽

和居厚弟韻

端嘉已羨谷鶯遷不覺龍飛人幾年
坡老嘗稱少公勝伯淳曾道二哥賢
騰箋內舉雖如此秉筆中書豈必然
歲晚偶同耆旧傳瞎翁安得似癯仙

畫筍有粉頭各題一絕

蔡奴

裕陵臨御始像祭武襄公部六何為者
圖形一禁中

二 婕妤

高帝開江左如天有太陽
迎歸皇太后放出小流娘

狂吟

兩輪屋角走如梭爭奈樛翁老病何富貴昔來年少
去神仙者少死人多刑羸全賴兒扶掖詩退猶須友
切磋莫嗟狂吟無律呂古人不廢飯牛歌

題趙志仁南溪雙蓮

迺翁去記玉樓成歲帥鄉人祀洛英文耀可無田助
祭象賢賴有谷傳聲竒葩融結雙蓮瑞奕葉追攀五
桂榮 將重候何足道幾人三世有詩名

挽趙倅汝稟

牛刺官雖滯全人世所稀生無瑕可指古以一死為歸
故笥斑衣在新阡鶴表飛銘齒仍相挽老淚拭還揮

應真二首

五百逋逃士劉郎不放心教醒阿羅漢飛空無處尋

二

支解離人毒香塗施主恩對天剖腸胃倒海洗親冤

贈東塔與老

南寺上人禪學苦東岡老子法筵開遙知大設伊蒲
供送汝挑包去撈齋

題倪魯玉詩後二首 龍輔

梅經御史勸成案村荷先皇勅扁堂少日不容人入
社暮年甘被子侵僵不因愚谷知名姓惟許孤山擅

影香豈獨江湖酌倡者卷中諸老半存亡

二

自從風雅陵夷後吟到梅村世豈多曠達知章歸後作
軒昂予美醉時歌擊蒙何止聞童稚謹塵犹堪去病
魔一聽牙絃三歎息今無鍾子奈詩何

雜詠五言八首 高唐賦

夢中求荐寢此事有還無幸得東安女為王洗厚誣

二 宓妃賦

魏帝思雖重川灵礼自防不曾簪美珥安能献明璫

三 洛神賦

燕燕鶯鶯喻工於狀婦容不知洛神賦此擬作鶯鶯

四 長門賦

園令詞章妙君王悔悟深能回九重眷只賣白斤金

五 寡婦賦

斷絃難續矣讀者尚悲辛不侶窮馮衍甘為薄倖人

六 靈光殿賦

難尋楚三戶不記漢千門獨有靈光殿長因一賦存

七 兔園賦

有劍彈驪缺無金築隗臺孝王雖貴介犹解客鄒枚

八 魏武遺令

埋向西陵裡千年不復晨未知臺上妓歌舞樂何人

兩曜二首

朝出陽谷夜入虞淵且看烏輪轉休論蟻磨旋

二月

不甘墓蝕月泣獻礫墓詩却効玉川子仍曾是退之

風雪二首

大塊號萬竅強名之曰風楚人無意義亂說有雌雄

二雪

持帚通樵徑堵築過蘇橋不知及門者若箇肯埋腰

放生五首

丹劑乾鉉永紅塵掃糝糠只消一隻鶴安用萬頭羊

二

戀闕子牟遠還鄉賀監狂老人忘節序有菊即重陽

三

鏡悲驚獨舞射感雉雙飛早認色空是晚知婚宦非

四

萬里先行脚三家晚閉閤曾求詩入海亦作史藏山

五

有酒聊排悶無書可訂頑君看鷺銜羽不若早知還

贈日者陳達夫

昔有君平季主今無韓愷林開終日垂帷閑肆或時
戴笠盤御

二

携翁書題閑慢萬言不直豪芒奪了巡官行貨換他
太卜才郎

記將李事

藐予小子衰殘迫惜我先人老壽稀厚樂能牽四皓
出畫罔幸送二疎歸子之互古芬芳史伯始終身糞
上譏穎叔資深俱已矣豈無來者判聃非

庸齋

挾策端平偶見遺不旋踵已過嘉熙雖聞栖楚叩墀
語不見陽城伏閣時下殿君能和富范上房吾願讓
夷夔或疑庶蘭曾相避知兩翁心更有誰

縱筆一首

不與人爭鹿常留客贈鯨遍參埋雪立輕舉御風行
鳴止三千歲游觀數十城
游閩闔
觀玉臺前遍方出咏又報
後篇成

後村先生大全集卷第四十五

後村先生大全集卷四十五

三

小牕不復聽吾伊時有蛩聲出吻悲曲宴無歌廢太
液中痛止酒飲華池誰將曉雪堆新鬢自撥寒灰銀
近詩未敢熟囑同社友草鞋尚欲遠尋師

四

百歲將闌猛省驚六根不足可憐生古人使祝焉祈
死叔世無人弔失明昔晔殘更羞渴睡今當清畫要
扶行時於夢裏瞻星斗愁絕隣鷄膈膊聲

五

越境迎鑿伎又窮殘骸奉施與天公外庭幸際清明

始內障如因黑暗中具景今難開隻眼薰絃昔忝和
重瞳暮年膝上惟文度常挈書燈伴乃翁

次韻君節祕書三首

甫登鼇頂浩然歸豈是區區較粟薇縱使吹聲雜堯
桀可無直筆辨眇非雷音首占第一義黛色終當四
十圍想見朝陽鳴未已在岐山下莫高飛

二

又從天祿閣中歸厭太官羊憶苦薇仍瑗昌言憂國
事永欽活直暴君非貴人高爵懸金印狎客閑情減
帶圍獨有冥鴻惜毛羽刺天未肯羨羣飛

三

寧作青袍朝士歸
烹烹未必勝
美薇易貪塵
世好官
職難泯
人心真是非
戰士未收青
野骨將軍誰報白
登園可憐鳩
鷓藩籬下
豈識垂天翼
怨飛

醉筆一首

滿椽花黃沃
巨杯一絲不遣掛
襟懷若非供奉仙
重
謫必是玄真子
再來有妓分甘徒
自臭無奴負鍾也
須埋平生不喜名
浮實佳傳何消上
曲臺

次韻林太淵二首

齒宿何妨意尚新
向來誤認假為真
漏名左相門首

客占籍愚公谷
裡人上知豈無千慮失
下官惟有兩

眉顰

晉人三下官不
堪其憂

史臣傳與頌臺謚
未抵孟中物切身

二

時賢多以刻為明
撫字催科鮮並行
聞舊吏民皆向
化喜新令尹不求
贏察廉外事非中
道立路傍碑亦
近名莫比尋常貴
公子長官清若一
書生

送胡石壁帥廣西二首

制難由來在一賢
青冥鈇鉞授中樞
漢家固已收羣
策胡運何曾有
百年不待焦頭蒙
上賞莫云幹腹是
虛傳提封五莞
色鯨浸黎母山
猶在次邊

二

此段君王付託誰明公身可荷安危常游參帶春携
客忽奪崑崙夜出奇忠定罷兵纔建紹襄公討叛止
筮宜腐儒雖憊如同載堪豪平蠻第二碑在龍隱洞

迎候林德輔帥參一首

西塾約余同薦禰六丁力盡不能留霜蹄屢蹶追風
驟皓首還登載月舟伊昔士元曾別駕即今子美尚
卷謀浮榮膜外何須較且可歸來秉燭游

感昔

曾見弘文館盛開難將汗脚泥金臺搜山不見之推

出入海難呼太白來士各自媒誰待聘世皆欲殺少
憐材空存先帝照回筆永闕巾箱不忍開

題法帖

二王萬古擅書名聞說臨池學始成痊鶴字猶看不
見黃庭小楷付來生

答學者

自古名家豈偶然雖游於藝必精專經生各守單傳
舊國奕帝爭一着先馬老于行知嚮導鵠騰而上暗
方圓殷勤寄語同袍者努力磨教鐵硯穿

南唐一首

建隆事得之遺老疇昔曾參野史看後閣夜猶歌玉
樹陳橋日已湧金盤可憐李主歸朝晚專靠江神立
國難誰道齊兵當十萬一身机杼不能安

古意

吾夫子喜稱遺逸太史公會傳滑稽堯帝杯曾遜巢
許即云唐堯揖
遜三杯酒武王粟不飽夷齊拾來穗即萬鍾祿
採下薇堪百甕壑不是狂言大無當聞之齧缺與王
倪

題畫六言一首

子猷無乘興舟越石有長嘯樓雪滅千山蹤跡月照

幾家樂愁

理菽書一首

軸猶揜高架祭已棄低墻可惜亡三篋安能讀一箱
自慙伯仁退不及阿宜長但憶初強記誰知晚健忘

二

難窺一字脚空皺兩眉頭孤露無三樂淒涼有四愁
詩疵捩鬚改丹走出神求元不離禪榻當年遍九州

用韻題卓州部樂山樓

城裏惟樓盡見山使君小築可三間弓旌招莫返長
徃爐竈壞方求大還及菊未荒歸粟里有芝堪茹老

高顏鶴書曾賺幽人出只恐先生又予環

銘座六言二首

象跡跡露埋齒麝以香聞割臍羣兒爭放紙鷓老子
寧為木雞

二

數步覺蕭娘臭三日聞荀令香涑水公銘衾戒乘崖

老按劍防

蕭答性惡婦人相
去數步批聞其臭

耳鼻六言二首

萬法與身俱幻百骸惟耳尚聰文公為補琴操回仙
邀聽松風

一 飢慣食腥腐三嗅不分臭香殘質心灰已久末年
鼻癢何傷

蝶庵一首

萬里求師脚力頑可憐無藥駐童顏遊梁曾在鄒枚
右反魯安能季孟間但見堆金守鄙塢未聞全壁出
函闕堯如天大逃馬往莫費巢由自買山

世說云未聞
巢由買山而隱

即事六言四首

官情為虎為鼠世態如雲如輪武夫駕育宰相醉尉
呵飛將軍

二

有時眼花落井有時鼻孔撩天工詩只是少點說禪
莫是大顛

三

骨已朽黃泉下傳猶列青史中猛扑時來宰相闖張
運去英雄

四

早詠白駒在谷晚駕青牛出闕寧為魚點墨退猶勝
鶴帶箭還

古意二十韻

自從混沌死萬象困穿齧淳風誰挽還古意日滴薄
余幼膽輪困泛濫通流略短篇堪掣鯨片文可驅鰐
吾嘗觀竅妙渠敢譏離駁比未陟菘岱南僅覽衡霍
菊坡評三雋崔公以陳仲齊方孚
若及余為閩之三雋竹隱表一鷄余受

九州導從惟一鶴飄然乘剛風騰而上寥廓金色大
十界水渦幾萬落荒哉漢陵闕蕞爾遠城郭遂窺子
宗廟盡見佛樓閣叫開閭闔雲耳聞鈞天約吾持此
安歸喜極還驚愕恍疑綠崖墜又恐行路錯詩魔暫
辭去來如隔日瘡易展隨天翼難踏實地脚萬病皆

有方惟狂不可藥拙吟示兒曹聊記武公誌

送王南海二首

元達礼部之子

昔作翹材客曾談執友賢雖無金屋貯賴有歸窠遷
比老飛仙去斯文什嫡傳病翁猶未曠要聰武城絃

二

史氏傳良循儒家果藝科土荒耕老少海近販人多
古有寧馨語今無子薦歌懸知新令尹琴調得民和

挽陳司直二首

五朝際遇諸家少四葉封崇一品榮不似鶯花貴公
子宛然螢雪老書生交游綠野舊賓客濡染滄州賢

父兄吾老理辭失之約餘哀翻入薤歌聲

二

隆乾事契姑休論歲晚相看成兩翁吾女偶留郊霽
下君兒亦晚縣灘中清伊高會著英少碧瀨新上伉
儷同我有蔡邕書欲付未知何日兆非熊

挽葛夫人二首

銀臺曾奮塗歸筆我亦留花批逆鱗早共裂麻沮裴
相晚甘負耒作滕民兒班衣從雙旌貴毋繡簾迎萬
戶春方擁皇華荒大國誤他多少借番人

二

不惟婆嫂成嗟惜學語兒知此母賢味薄居常喜蔬
食心慈勸勿用蒲鞭若非騰上宮天裏必是迎歸海
岸邊九十老農來祖奠眼枯不覺亦潸然

謝景行方寺丞惠衣二首

潁州牧念予絕潔見遺上衣并下裳澤畔年裘未韜
晦雪中鶴氅大清狂笑金谷友望塵繆誣紫陽翁攷
古許更惠雞栖車一乘十分結裹老文昌

二

初裁隱服師揚陸忽贈身章別一般似雪精締烏表
襖桃花文錦作中單何妨俗笑浩然聳不要人憐范

叔寒孰若子衣安且吉絕勝劔履進賢冠

抄戊辰十月近藁七首

後學鮮能舍瑟作古人未免假韶鳴不勞左轄誦新
句却愛老婆呼舊名史館誰徵段公事離家妄作武
候評人間安得忘憂物焉宴儒生澆不平

二

識之無字憶髻年罹地紅顏變雪顛求狗監人難復
得如雞林相豈非賢鯉庭聞處才三百蚓竅唾來忽
五千寄語毛韓并衛卜不煩序亦不煩箋

三

頂雪無多爬欲禿眼花亂發捩來空何如自號四休
叟不要人扶獨樂翁純白固知難諱老大丹未必可
還童不知後世許碑板似李邕耶似蔡邕

四

主公已換老龍名部曲無知覬龍靈執爨婢權呼小
玉指樵童暫段奴星奴子厚名旋推隣叟稱尊宿兼命雛
孫曰寧馨稚子不知儂爛醉剛來耳畔喚教醒

五

戶外梵然聞足音或怀漫刺袖新吟擗空愧不能觴
客綆短如何敢汲深薄俗求疵誰揜惡先賢慮患或

陽瘖回人豈待儂歲做持在螢窗且自箴

六

少狂費盡一生心叢藂如山雪滿簪揚子雕鎬誇賦
麗唐人鍛鍊說詩深庶人有詩源不敢論之句寒來尚可披裘鈞
窮殺何妨帶索吟社友蕭疎吾老大安知來者不如
今

七

疇昔榮途分寸躋危机不合上雲梯鳳皇池有人曾
奪鸚鵡洲無客敢題早不修真壤丹竈晚方受籙脫
金閨羽毛只可如鴉雀誰遣君為吐綬鷄

又五言一首

甫白不可作千年有廢壇
 虛逢右文主難獻采詩官
 與子學麟脯從渠切虬肝
 後生多美秀未可便麤瞞
 絕句二首
 枝上好花無十日松梢葉表
 有千年靜中勘破人間
 世醒者常愚醉者賢

二

浮榮已是卿慙長勇退猶稱
 相避賢先帝賜金揮未
 盡不應全仰作碑錢

六言三首

不識平唐坊裏多在村學堂
 中安得金錢買笑只堪
 夏楚訊蒙

二

不入城裏市裏常在水邊月邊
 蜀公有疏謝事米老
 無書辦顏

三

溪北酒旗裊裊溪南社鼓
 鏗鏗寧問舖槽漁父懶水
 賦芻徂公

壺山一首

俯瞰二州煙曉靄遙瞻八面
 壁崔嵬廼知仙聖門庭

廣也放長房跳入來

相法一首

始射仙風肌似雪
盧郎鬼質面如藍
不勞鑒裁分妍醜
但覽丰標辨聖凡

先識一首

折戒幾曾參古德
死人不信有神仙
蚊蚋縱使皆成佛
竟出圓雞犬何修得上天

讀阮籍傳一首

言出勿命圭有玷
古捫不及駟難追
阮公托醉歡進表
龐老無名受禪碑

題韓柳廟碑一首

韓柳子孫皆物故
士民尸祝尚如新
吾行天下已頭白
三百年唐惟二人

挽林學錄五言二首友聞

節麾三世顯螢雪
一生貧愈積家餘
慶咸稱里善人幼
常推李泌負做以男
對老忽哭盧綸
聖惡無從涕那堪
是外親

二

昔報尊公計奔喪
萬里程生居諸子
下身代二兄行負
骨老純孝分財見
不爭九原面先男
應問白頭甥

送莊糾一首

忽枉高軒訪殷勤不忍離雖書督郵考率在過庭時
辯素推三語清尤畏四知歸裝無長物一首後村詩

雜詠一首

晴是義和喜陰是嫦娥妬暖是青帝來涼是赤驃去
災是旄頭出祥是奎星聚雷是阿香噴濤是靈胥怒

字說一首

半山字說行精義極貫穿世好鵝蚓書誰識蟲魚家

目青六言一首

暮年因耽黃卷雙瞳忽雀盲如來生願為蒼頡四目

造鳥跡書

夢覺一首

拋書哈噓聲裏轉枕屈伸肘中盧生相黃梁舍沈郎
塔翠微宮

匡人一首

匡人不識夫子往也發其笥中但有深衣古履元無
室玉大弓

懷真趙二公一首

南塘清談壘也西山至言琅也七畧通羣書博一生
短千載長

留侯一首

一槌復九世讎編書封萬戶侯指視紫芝翁出身從赤松子遊

遊仙一首

懶為隨駕處士寧作閉門隱君秦系有壽風興閉門之句跨青牛導紫氣乘黃鶴上白雲

題趙昌花一首

葉齊侍郎舊物得之其孫孫約

趙叟生長太平以著色花擅名自古良工獨苦于今墨畫盛行

題堯源圖一首

但記羸二世爾豈知晉太康耶一境渾無租稅四時長有堯花

貴公子一首

春圃鶯花園席秋堂風露入簾寧以眉承蹴踖不將手觸牙籤

讀開元天寶遺事一首

環子受兵火浣梅姬如玉雪清二妃未免遺恨三郎可煞無情

醉醒一首

醉夢發於真性醒狂或者矯情左相飲如川吸龍圖

笑比河清

讀韓信馬援傳一首

伏波自托真主淮陰願鳥假王病厭鳶飛鼓噪晚悲

鳥盡弓藏

畫贊七言一首

驢加九錫石三品鳥覩村翁晚節榮出有小車扶有

杖前身莫是邵先生

又六言二首

韶顏譬槿花爾榜腹僅椰子如不知作千年調誰教

盛萬卷書

二

有載書盟三友無文章送五窮怯懦寧出跨下清狂

羞入禪中

劉伶云諸君何鳥入我禪中

五言一首

驢多鳥令僕蟻亦拜侯王恰則封萬戶俄然夢一場

雜詠六言八首

退之效玉川體子美和春陵行古訓後生可畏俗語

文人相輕

二

聖御遺令畫贊淵明祭文挽詩乍可裸尸仰藥勿求

勅葬宣墜

三

龍章鳳姿中散慶頭鼠目十郎一遺恨悲風操一老
死偃月堂

四

大將軍無舊客四公子成古墳寄語魯仲連革買絲

繡平原君 李賀詩

五

上壽却來百歲厚祿不過萬鍾陋巷儒死廿九灌園
子辭三公

六

遊俠客無珠履故人子有練裙小措臨樂毅論太息

祭田橫文

七

痛罵老奴尊已錯認廁鬼為妻先儒重鄭玄易三孤

喜李赤詩

八

盧老教問破屋張公九尺長身容膝何妨嘯傲打頭
不敢欠伸

雜詠五言五首

傳呼尤赫亡變滅忽休亡鴻筆銘勲績蟬冠斂觸髀

二

奴視申人少庭機左戚難高爹嗔李白新莽基師丹

三

親朋存者少歲月去如馳不記堯三竊猶疑黍一炊

四

乾鵲噪送喜訓狐鳴主災龍隨黃帝去麟為素正來

五

敝廬吾亦愛陋巷人不堪癡兒蝸帶屋老子繭名庵

雜詠七言二首

夷齊甘受周家餓申伯曾遭漢法髡全活老臣殘齒
髮來生尚欲報君恩

二

清禁已無蓮炬分名山尚欠草鞋緣賀公未是真知
已却喚詩作謫仙

跋潘岳悼亡一首

長恨齊眉人已往可憐尊足者猶存乃知劔履圖麟

閣不似琴書隱鹿門

左抱琴書
右携妻子

題佛書六言一首

圓隨如一百八大知識五十三旋學梵音朗誦老無

脚力遍參

凡聖一首

死生非有二致聖凡於此一般
桓魁預爲石柳王喬
尚欵玉棺

梅開五言一首

陶翁書甲子楚客紀庚寅
村叟無臺歷梅開認小春
記方導師事一首

块軋司元化回環列衆真有稱
金闕令無記玉樓人

御前輩方導師法
御稱金闕尚書令

後村先生大全集卷第四十六

後村先生大全集卷第四十七

詩

居厚第乞以礙止法官回授公朝特俞所請
族子有詩志喜居厚次韻邀某同作效顰一
首既拙且鈍錄獻家廟

回馳異渥之未聞涼
乾淳生氣存頻對青藜真濟
美雖埋玉樹尚追遵奉新鸞誥陳幽壤距小麟臺只
近村太息琰玄皆老矣誄成姑以寢焉園

晚意

鷄報東方欲白時
林上羣動起飛馳
匹居峴上入城

後村先生大全集
少頗怪淮南拔宅遷驚餌何妨潛密藻安巢謹勿托
危枝末年慕用寒山子不是行家本色詩

道房六言一首

懶白衣作宰相寧黃冠事老君試問讀三萬軸何如
誦五千文

謝諸高貴載酒

携翁九裏逢初度洛社耆英共舉杯富相若邀康節
入溫公亦喜小程來每慚席上陪真率誰道高中愛
打乖不怕醉歸盧老擷芙蓉月恰照人懷

再疊

洛中舊話誰拈出幾載寥亡有此杯迂叟力辭年高
晚先賢羞與尹俱來寧陪邵子稱安樂免使歐公笑
僻乖况值霜天好風月皺眉不若且舒懷

三疊

景迫桑榆歡意少相依藥碗與茶杯忽聞有客載醪
過誰道無人裹飯來家在恍驚如鶴化歲盍未可罪
龍乖閑吟不與君爭巧自作村田樂散懷

老嘆一首

少豪扛鼎復塞旗倏忽才情已竭衰今無百斤金買
賦古有九千緘作碑毛錐盡秃難藏老塵尾高懸合

授誰他日學人求肘後不消挽些與哀詞

題達卿種別墅

吾門不幸去葉亡賴有高才出鴈行自擬退之稱稍
點孰云白也是陽狂表阡鶴許儂歸老飲硯虹烏汝
發祥它日離鸞僚黃誥分墻應許及聯牆

示強甫

昔受浮丘伯密傳馭七轅固伏生年試橫收笛花間
飲勝看朝冠拍下眠天上錦袍曾奪得山中石硯又
磨穿秦系以石為硯注老子生來羞舐淮南鼎且戲塵寰作地
仙

示沂孫

過去光陰電莫追鏡中非復舊鬚眉已拚眸子難重
即猶幸心官可若思太極旋闔無極義極玄更有又
玄詩此篇若問何人作向道山中老古錐

師友六言一首

聞諸師者本同取之友者亦公高才有出象外精義
不離箇中南渡大儒管見西山先生正宗

記箕山商野事一首

放勛禪飲牛父軒皇問牧馬童曰夫子致南面稱天
師拜下風

赤姪孫改名圭行冠禮一首

冠非責童子禮兒必讀手澤書
簞瓢回也不改宗廟赤爾何如

霜菊

霜菊尤宜晚纔開一兩葩不隨蒲柳變
索姓待梅花

蘇柑

橘裏爭棋叟壺中賣藥公蘇柑肥似瓠
盛不得携翁

小勞

性不耐閑懶小勞方小佳居沉成薄片
未麝入新芽病起

不求玉杵上不要水銀匕但祝未來世長為無病人

夏候嘉正云有二頌一知制
詰一日一見水銀匕一兩

物化

今朝風物甚美明日陰晴未知夕陽無回照
理落花

有上天時古詩飛上青
天姪落花

蚋

蚋穿稿壤及黃泉蜂採花房與柳綿微蚋
么麼殊嗜好以醢焉密甕為天

雀

恰見趨燕市俄聞集兔園雕籠訓養者誰到
翟公門

惜春

亂漂源裏紅雨淨洗枝頭雪綿只訝飲非前日安知
春是去年

予點

聲音笑貌可為顏色哭泣難揜聖人無私喜怒見於
誅予與點

客問宗旨一首

萬物泛觀皆我闥諸君何事入吾禪不須若問儂宗
旨醉裏聞之洛誦孫

咸淳龍飛大魁之歸卿大夫以某兄弟有二

日之長俾主其事水村農御謂某當為詩為
壺山喚回百年英靈之氣客散詩成翌早錄
呈且約同社屬和

傾城迎侯錦歸忙兒女鮮衣伎曉執龍首榜采春滿
郡鷄栖車已夕還鄉團司局結慈恩寺一炬燈傳舊
弼坊莫作尋常先輩看淳熙相府甲科郎

再次前韻

射策人如射利忙豈知世有古來粧漢庭儒半壞科
舉天下士寧論國鄉但說高標廣寒殿誰能更讀善
和坊觀君毛羽真鸞鳳羞殺麤豪白面郎

次江權軍宴新進士韻

病翁無計出愁城喜甲科即競拾青土禮尤隆真刺
史華宗相望兩魁星董生至論惟三策韋氏單傳只
一經舉首愛身如拱壁修於家肯還於廷

聞喜宴李教君瑞不赴小詩贊美

贈人肝與採山薇舉世營亡為飽飢始信洋亡而逝
矣已烹鷓亡復哇之伏鳩雉亦防身害疇昔羊能兆
禍基獨有廣文君卓識殘盃冷肉也牢辭

始冰

始猶飄灑忽嚴凝村潦初看盡失驚色裹入城問著

伯一名木稼一名冰

有客

幾載庭空雀可羅朝來忽有客相過似知老子條冰
進不道先生鬢雪多

東春谷工部

假使富埒國何如貧在家尚存儂漢扎寧奪我齊瓜

七竅鑿

自從七竅鑿無復六根全鯨死彗星出墓枯月魄圓

遷客黨碑

人無公議論天有真是非佛肯護遷客雷能碎黨碑

全宿奏事

過客危於患移僭遠似瓊末年藥珠殿奏事獨金星
飲者

大醉害心風小醉臥咽嘔世有大先生一飲石五斗
怕愛

月中玉女雖嚴冷雪裏瑤姬轉麗華不管達官怕木
稼且留處士愛梅花

餘寒

老子今年八十三怕寒渾未試春衫尚存晉宋間人
意折得南枝帶雪簪

趙昌花

要識洛陽姚魏面趙昌着色亦名家可憐俗眼無真
賞不寶丹青寶墨花

天奪

曩造河沙業今災夢幻身不知若下電天奪與何人
逃禪便面

姑射吸風仿飲露洛妃習禮更明詩梅花渾不施朱
粉直以天香與雪肌

聞東軒訃

君給相如扎吾方長道山燕猶棲舊壘駒已養天閑

位通將求說書來欲鑄顏柰何化鶴去不見珥貂還
惜舟

生世誰令抱百憂點黃不肯上眉頭江邊風雨飄蓬
箸愛惜扁舟一宿愁

天塹

興亡天數亦人謀戰艦蒙衝一矩休雪浪如山限南
北不瀟江令沈侯羞

送客

夸毗子有誰存者思澤侯何足道哉一葉絕江載愁
去萬花環席突圍來

固窮

狎邪早不由三閤岫強今難事五樓寧伴伯夷山下
餓豈隨徐福海中求

顛危

老稍慮航危隆棟憂廈顛危欠維楫爾顛將覆壓馬

節惠

醉似東臯子愚於北谷公何當節一惠單謚作愚翁

化蝶

鶴肯從坡老鳩能感醉翁老夫曾化蝶飛入百花中

封邑

後村先生大全集
髮似蘆花面削瓜躬圭錦襖忽高華願還封邑九百
戶小築茆茨三兩家

菜地

依然山澤一臞儒幸有先疇與敞廬聞說醉鄉方弄
印不知堪拜小侯無

逃愁

年飢未可傾家釀晝短真當秉燭游中國醉鄉隔萬
里豈無寸地可逃愁

温故

號寒博士燈檠作凍死秀才衣帶詩鯨吸偶陶兀兀

蟬嘶尚怪七奇曩時小家教歲晚大宗師

受用

阮遙集平生幾屐晏平仲半世一裘禿翁受用能多
少掬葉為衣荷蓋頭

自箴

夢亦齊莊非矯疾病猶温習見操存生柴參從千餘
載恍似同時及聖門

飛將

漢有烽起上林無鴈來可憐漢飛將虛築望鄉臺

退之

向來謾墓人其報在身後柳車不免埋疏黃安能壽
碑板多篇七說不朽溘先同露電沙魘曰山斗

李杜

李杜文章宗繼者宜重黎伯禽視熊驥未易分高低
小者善釣魚大者能柵雞世無託孤者練葛誰提携
謫仙葬青山女嫁爲農妻州牧選高援使嬪於中閨
曰禽鳥有匹寧合不頤睽生於隋唐後名與姬姜齊
吾家中壘公惜不經品題

昌谷

王孫乘顛氣九萬里空洞春風吹玉唾點七成綵鳳

惟僕命騷直恐無雅頌暮歸阿嬾喚奴輩錦囊重

商翁

初隱靈芝處終逃小橘中誰言秦法密網不得商翁

樂天

衆評白傳謚誰得樂天心小太宗英主臨朝謚醉吟

凍水

洛下人呼爲迂叟非惟語簡意無窮曲臺不合加美
謚俗了深衣大帶翁

高光

發兵坑黥布豎子踞洗罵隋何腐儒誰道東都重名

節故人只喚作狂奴

感擢

老賊所憂惟備權豈知中憤氣同然諸賢莫道江東

小蹙擇惟消兩少年

琬逃

遷喬不與鶯爭出殿後猶云馬不前越石早知無合

故不如且讓祖生鞭

曹孟德少作

精舍觀書二十年偶窺沸湧出饒涎小豪已草黃巾

檄老大遭燒赤壁船半夜官嬪和淚訣當時漢禪只

心傳後來仍有朱三輩欲比英雄恐未然

孫伯符少作

覆略誰堪敵伯符每聞史冊想規模一千掃眾橫江

去十七成功自古無不分老瞞稱獅子便呼公瑾作

姨夫君看末命尤奇時指顧張昭高托孤

劉玄德少作

老瞞虐燔市朝空宗室惟餘大耳翁漢賊有誰分逆

順關河無地着英雄紫髯久矣營江表黃屋蕭然寄

映中可惜姜維膽如斗功雖不就有餘忠

魏志操下令云向使國家無孤不如幾人稱帝幾人稱王

復木先生大全
稱帝稱王非一個國家不可便無孤此言只是瞞孀
幼豈有英雄也德愚

二世

失國之君多咎政興王者作著休符亡秦天告由胡
亥非謂長城外有胡

質子

七雄側目虎狼都仁暴端由取舍殊燕太子留生馬
角王心作牧羊奴

郡宴

瑤琴能挑文君意玉笛安知號國心但是有情俱感

動惟村夫子不知音

冬蚊

南州時令科冬月有蚊飛豈是為飢崇因而觸禍機
照尤嫌畫燭驅尚入羅幃吾母音客遠何妨用扇揮

冬蠅

百虫已藏墊此物出何哉甚矣綠衣借公然赤幘來
居嘗汚脯醢尤喜敗搏粟刑故寧論小無分卵與胎

隱者

寧採箕山釣潁濱放勳天大不能臣漁郎未必知年
代先有逃堯次避秦

偈

遠希大慧無

大慧云有偈無偈當甚熱大

近笑孤峯絮

孤峯偈云末後一句

雙手分付更問如何絮

多少初地人爭問末後句

秦紀

上廣魯吞九雲夢民勞因起一阿房人皆憐楚三戶在天獨知秦二世亡

自警

司馬賦中聊諷一伯魚詩外又聞三宗空餘物表陵雲氣不向師前立雪參

齊俗

拓寢纔休又雪宮殺麋罪與殺人同祖丘稷下人多詐誰肯投身入羿中

源裏

一洞沾秦俗疑非太古民盡將源裏事報與世間人

中說

先業歸猶在遺經讀未終豈無門弟子私謚作文中

軼道

秦暴渾如狼牧羊築臨洮郡至咸陽若防齊客出關外豈料子嬰降道傍

求鳳曲

古有輕生士今無起死醫可憐茂陵渴猶盡遠山眉
刺客

不子一毫事空捐七尺軀陶惜其人沒雄纔以盜書

法言若荆刺
君子盜諸

古墓

龜趺但見碑訛缺馬鬣安知葬舊新想見若敖求食
鬼亦羞東郭乞墻人

舊遊

扶胥黃木水連空曾讀韓碑訪祝融安得六丁机萬
弩岷江西去海潮東

歲除即事十首

聽得先生去拋書喜欲顛吾聞渥洼種墮地不須鞭

二

門外呵寒客鶉衣百結懸藏瓶猶可撲莫費水衡錢

三

甚情光陰去其如耄老何丁寧小兒女不必看鄉儻

四

歲晚備耕者人人訴滂乾吾寧減私量汝莫待租癩

五

賣菜猶求益栽梔不厭多小園兩三樹冷淡奈春何

六

想見朱衣吏催排玉筍班老臣絕朝謁北望祝南山

七

細切如絲菜添斟獻頌椒未曾守除夜早已問元霄

八

聞說醉鄉裏家二設酒壚有劉伶肯飲無李白誰沽

九

草市芳菲節柴門寂寞濱拖符聊塞白兔謗作詩人

十

瘦骨春衫薄華顛綵勝垂菱花應竊笑拚束不相宜

錦孫

胎髮落居後屠蘇飲最先眉間八十字頤汝過翁年

葵女

早惠能言者前生結習餘吾問伏生女口授古尚書

短章

少日喜累句暮年多短章假令重盛壯展拓不能長

二

衰殘齒易宿陳腐意難新安知癡老子非復舊詞臣

新春二首

聞禽啄木心猶喜躍馬追花事已非今與東皇盟秋

了留春死不放春歸

二

春說吾去留靡定又云君醉醒難知即愁醉裏逃而去不道先生有醒時

後村先生大全集卷第四十七

後村先生大全集卷之四十八

詩

畫贊

雖則丹青妙具如齒髮衰遠孫元未識認作故鍾馗

時事

問訊班春守牢辭餽歲人翁年十分老時事一番新

二呂

韓呂真喬木蟠根與國同伯泰太史氏子約大愚公

立春十四韻

嘉平至孟輒麗譙春再頒齊民撥不開雜還來如山

農家卜休咎多以敲觥觀頗聞舉體亦其咎為燥乾
又云尾角白亦慮冬和寒吾憊不能耕對之發長觀
平生願豐心雖老猶如丹方興西疇務稍覺南船慳
展轉夜少眠嘔噎晨廢餐敢望餘糧栖漸恐拾穗難
陛下仁如天役簡稅賦寬臨遣皆循良黜削先號饗
殘一麗丹書內孰若青史間僕方儕民伍誰為語縣官
老少

倚伏

上樹千回時已過遶枝山匝老安歸向未誤立紅雲
畔逃入青山計未非

且可飲杯中物誰能管身外愁穢糲奄終元載短衾
可斂黔婁唐詩元載以斂
飛舉其口而終

螢曦

螢微化因草蟻聚國於槐繆折封侯爵借為思子壺
九泉謀螫處十月有霜來穹壤大如許爾曹小矣哉
范睢魏齊
士固不可辱人殊未易知元來座上客不及箕中尸

瓜李

蠅及瓜勿啖糟食李何妨苦淡誰知味甘鮮或腐腸
盤龍藥大

豪傑爭揚尚神仙食馬肝豈知有薇蕨布滿首陽山
達生

無二客穿塚殉有一奴荷鍾從勿煩作者諛墓莫管
鄰人相舂

儒釋

鵝湖始若小異虎溪豈必皆同平亭晦庵子靜狸合
淵明遠公

閑情

宴坐僅留半窓月歸裝只載一般愁可伶潘令無標
致却為閑情白了頭

諸侯客

大吹雞鳴者皆為席上珍如何彈缺客亦有竊弓人

三和粧字韻陳魁載酒

榮途素定不須忙羞作春妍愛古粧衆促奪袍詩進
御君寧微服夜歸鄉惟未尊老非歌席移就菩提養
病坊聞說重題新鶴表分留印 與諸郎

孚應詞十二韻

吾翁宰未下有蛟穴而居一旦忽死去靈物不待驅
春時灌口君髣佛其人歟但當詠雩風不必焚尫巫
三農相勞苦萬頃皆上腴其功及百世否則吾其魚

沈沈

出陣步傳

乎應詞綸魚紫碧朱何當春服成童冠相

携扶字醴薦闕宮風采謹康衢它日送迎神詩亦不

可無吾筆雖卑弱實錄非敢巫裴然勒碑陰竊比韓

與蘇

歲除前一日

暮年心膽怯臨履極兢兢已被梅花惱時為爆竹驚

演雅二十韻

學道無所得惟於鄙事能九奏後篇什來世有公評
豈未登社壇直欲破劉城六言與七字如九轉煉城宇
宙中間物瑣屑不記名孰能通倫類批抉其微情城

以燈為光虫衆成雷声柔老蠶重白草腐虫燭

明幽谷聞蠻綿知有逸喬鶯落日見科斗深夜蠅

蚋鳴嗜醯雜襲蚓飲泉亦清

半山詩云榻壞太甲俱有未可能此蚓獨清廉

蠅吮血美羊角犬以穢為侯鯖蛇非性好曲蠖負屈

求伸蚤懼鶴鷓撮自匿於衣巾虱愁犢鼻破不免景

略捫孤依塚作祟鼠謂社可憑痛擱一掌血飽

食五鼎烹疇昔同袍子來問儂師承前柴桑處士後

半山老人詎能追

却謝

蒙叟云大儒倡晉人以小字呼謝琰僅呼未婢方田

故是儉奴晉人簡傲多呼人小字按謝琰大傳少子小字未詳破符監者又知暗字方回鑿長

梅妃

蕭能妻弄玉琴可挑丈君吹徹能寧哥笛梅妃未齒

寄強甫

困罷相依螢雪邊安知今汝葉顛寧從款乃翁孤釣
肯要原夫輩一聯柳詩孤舟蓑笠江雪免向詩中得三昧
吏鉗紙尾怕分權客言大尹尤謙挹每見屏星搨心懸

春詞

人競迎新歲儂方餞舊年雖鶯又百轉高柳忽三眠

題海陵徐神翁墓

忽破黃符迫下山許携若帚面天顏早知錦纜盛宮
女因舍紅巾問阿環空有蚰蠅侵玉骨斷無龍虎守
金丹秋墳翁仲相酬答日落僧歸家閉閤

寓言

赤肉圍終當敗壞臭皮袋死尚貪癡生憎銅鏡催白
髮殘着珠襦待赤眉高築迷棲愁鬼瞰多為疑冢怕
人知吾評裸葬尤堅久來狂何曾桂一絲張紅紅白白
莫相謾無限真人赤肉團敗壞不知猪狗相只今便作死尸看

後村先生大全集

則破堂

芳臭

流芳斜谷出師表遺臭樊城受禪碑芳臭即今皆判
矣鮑魚難揜祖龍尸

後村先生大全集卷之四十八

第 35416 号
平成 3.11.22
聖和学 928
園短大 3
図書館 11

第 5112 号
 第 3 册
 卷 1
 第 1 页
 大 数 学

秀

